

Vijećnička pitanja:

Dževdet Huskić: je postavio dva vijećnička pitanja. Prvo je da li je u planu restauracija i spašavanje od potpunog propadanja rodne kuće narodnog heroja Rudog Čajaveca koja je u katastrofalnom stanju? Drugo pitanje je zašto je općinskoj Facebook stranici koja se zvala „Općina Kakanj“ promijenjen naziv i sada se zove „Općina Kakanj – načelnik“, kakve promjene se mogu očekivati u vezi sa sadržajima koji će se objavljivati i ko je administrator nove stranice?

Marcela Ravlija: je postavila vijećničko pitanje kada će, na koji način i po kojim kriterijima biti podijeljene subvencije penzionerima/umirovljenicima, a imajući u vidu obećanje Općinskog načelnik o podjeli subvencija penzionerima/umirovljenicima od sredstava koja su bila namijenjena finansiranju proslave Nove godine?

Vinka Aletović: je postavila vijećničko pitanje zašto na sjednicama Općinskog vijeća još nije razmatrana inicijativa o formiranju nove mjesne zajednice na području Slijevnica i Željezničke stanice, obzirom da su mještani Slijevnica i Željezničke stanice sredinom prošle godine održali zbor građana na kojem su jednoglasno podržali inicijativu za izdvajanje iz MZ Bičeri i formiranje nove mjesne zajednice na teritoriji tih podružnica?

Mirsad Tursum: je postavio vijećničko pitanje da li je moguće na novoizgrađenoj saobraćajnici, kod zgrade Općinskog suda, postaviti znak zabrane skretanja iz pravca Stare jame prema Domu zdravlja i obratno, iz razloga što na završetku novoizgrađene saobraćajnice iz pravca Stare jame vozači skreću prema Domu zdravlja pod ostrim uglom čime dovode u opasnost sve učesnike u saobraćaju?

Safet Šahman: je postavio vijećničko pitanje kakvo je trenutno stanje sa ambulantom porodične medicine u Brnjicu, odnosno da li ista radi obzirom da prema njegovim informacijama u istoj nema grijanja?

Mirsad Tursum (odgovor): je rekao da nema informacije da ambulanta ne radi i da nema grijanja.

Safet Šahman (dopuna pitanja): je dodatno pojasnio pitanje i naveo da je jučer bio u ambulanti i da nije bilo grijanja, te je dobio informaciju da danas ambulanta neće raditi iz razloga što nema ogrijeva.

Mirsad Tursum (odgovor): je istakao da ogrijeva u ambulanti Brnjic ima dovoljno, ali je čovjek koji je bio angažovan za loženje odbio dalje da radi, zbog čega je ambulanta zagrijavana na struju, a da se radi na angažmanu novog lica koje će biti zaduženo za loženje, te je istakao problem krađe ogrijeva iz te ambulante.

Predsjedavajući je konstatovao da su vijećnici Branko Češljčić, Namir Talić i Aldin Šljivo postavili vijećničko pitanje bez korištenja govornice.

Branko Češljčić: je postavio dva vijećnička pitanja. Prvo je da li je tzv „šljaka“ sa TE Kakanj zabranjena za korištenje kao abrazivni materijal za zimsko održavanje cesta u gradskom i širem području i području Ponijera, te kako je definisan posipni materijal u ugovoru za održavanje ceste? Drugo pitanje je dokle se došlo s pokretanjem obnove i restauracije kuće Duspera u Kraljevoj Sutjesci uzimajući u obzir da je taj nacionalni spomenik Bosne i Hercegovine oštećen i u raspadajućem stanju?

Namir Talić: je postavio vijećničko pitanje u kojoj fazi se nalazi izrada potrebne dokumentacije za izgradnju mosta u naselju Modrinje i kada se može očekivati početak radova na izgradnji tog mosta?

Aldin Šljivo: je postavio vijećničko pitanje na koji način je izvršen izbor zakupca prilikom iznajmljivanja ugostiteljskog objekta u Ski centru Ponijeri, odnosno da li su usluge bile ponuđene javno i svima, kada i gdje je objavljeno, do kada je ugovor potpisan, koji su uslovi u ugovoru, te da li su iznajmljene i prostorije pomoćnog ugostiteljskog objekta uz ski stazu?

Vijećničke inicijative

Dževdet Huskić: je pokrenuo dvije vijećničke inicijative. Prva inicijativa je da se izradi akcioni plan spašavanja, čišćenja i uređenja 9 kakanjskih rijeka koje nastaju i čitavom svojom dužinom teku na prostoru općine Kakanj, te rijeka Bosna koja dijelom svoga toka protiče kroz Kakanj. Predložio je da nadležna služba u saradnji sa mjesnim zajednicama izradi plan kojim će se pokušati zaštititi od dalje devastacije i zagađenja kakanjske rijeke, a zatim da se iste očiste i urede njihova korita. Druga inicijativa se odnosi na podjednako promovisanje na FB stranici „Općina Kakanj – načelnik“ i na gradskim displejima kakanjske turističke, sportske, kulturne i ostale ponude i sadržaje bez obzira na stranačku pripadnost ili simpatizerstvo prema određenoj političkoj stranci direktora ustanova, organizacija ili fizičkih lica koja stoje iza navedenih sadržaja.

Marcela Ravlija: je pokrenula dvije vijećničke inicijative. Prva je za postavljanje konveksnog saobraćajnog ogledala u ulici ZPO, iz razloga što je uključenje u ulicu ZPO-a iz smjera zgrade Šumarije (kod slastičarne „Ela“) veoma nepregledno, naročito pri skretanju u lijevo prema Domu zdravlja. Druga inicijativa se odnosi na ugradnju sistema za rekuperaciju zraka unutarnjeg prostora u JU „Mladost“ Kakanj, iz razloga što se štetni uticaji lošeg kvaliteta zraka prvenstveno ogledaju na zdravlju osoba koja unutra borave, a uz to se odražava na pažnju i akademski uspjeh predškolske i školske djece. Podsjetila je na Rezoluciju o zaštiti i kvalitetu zraka u zatvorenom prostoru koja je usvojena prije više od godinu dana u ZDK, a jedna od konkretnih aktivnosti iz iste je ugradnja sistema za rekuperaciju.

Mirsad Tursum: je pokrenuo vijećničku inicijativu za iznalaženje lokacije za izgradnju ambulante Plandište. Razlog za inicijativu je što je ambulanta Stara jama, koja pokriva područje naselja Plandište preopterećena, pri čemu ista ima preko 5.000 kartona pacijenata.

Safet Šahman: je pokrenuo vijećničku inicijativu da se u program podsticaja u poljoprivredi za 2023. godinu, uvrsti stavka podsticaj za voćarstvo, proizvođačima jagodičastog voća, malina i dr., za nabavku protivgradnih mreža i mreža za zaštitu od mraza, što bi pomoglo proizvođačima da se umanje uticaj vremenskih promjena, koje su posljednjih godina izražene, a zbog čega proizvođači trpe značajne štete na svojim plantažama.

Predsjedavajući je konstatovao da su vijećnici Fakir Ajdnović, Sabit Čehajić, Namir Talić, Adis Mrkonjić, Adnan Čobo i Aldin Šljivo, podnijeli vijećničke inicijative bez korištenja govornice.

Fakir Ajdnović: je pokrenuo vijećničku inicijativu za izmjenu i dopunu Odluke o utvrđivanju naknada članovima upravnih i nadzornih odbora javnih ustanova u dijelu koji se odnosi na visinu naknade za predsjednike i članove upravnih i nadzornih odbora. Razlog za inicijativu je što su naknade članovima upravnih i nadzornih odbora javnih ustanova znatno manje u odnosu na naknade članovima skupština i nadzornih odbora javnih preduzeća kojima je osnivač Općina Kakanj, čime su članovi organa javnih preduzeća dovedeni u povoljniji položaj.

Sabit Čehajić: je pokrenuo vijećničku inicijativu za pripajanje naseljenog mjesta „Novo naselje Bare“ u sastav MZ Plandište iz razloga što je to naselje trenutno u sastavu MZ Kakanj I, a isto je prostorno i infrastrukturno vezano za MZ Plandište.

Namir Talić: je pokrenuo vijećničku inicijativu za asfaltiranje pristupnog puta prema školi u naselju Zagrađe gdje se nalazi područna škola OŠ „Mula Mustafa Bašeskija“, u koju idu učenici od I do IV razreda i gdje je pristupni put prema školi u izuzetno lošem stanju i blatnjav, što otežava dolazak djece u školu.

Adis Mrkonjić: je pokrenuo vijećničku inicijativu da se izvrši sanacija potpornog zida u naselju Albanija (MZ Kakanj II) na skretanju za Šimiće, jer na pomenutoj lokaciji dolazi do obrušavanja kamenja iz potpornog zida što ugrožava bezbjednost učesnika u saobraćaju na toj dionici puta.

Adnan Čobo: je pokrenuo dvije vijećničke inicijative. Prva je da se reguliše aktivnost sankanja na stazi za sankanje koja se nalazi uz ski stazu na Ponijerima, na način da JU „KSC“ Kakanj odredi dežurnog sa

konkretnim zaduženjem da uredi pravila ponašanja na stazi za sankanje, a sve iz razloga velikog broja povređivanja i postojanja realne opasnosti za nastankom i težih posljedica. Druga inicijativa je da se postavi dugi fiksirani usporivač brzine u Ulici branilaca, prije pješačkog prelaza, a radi sprečavanje nastanka štete i zaštite pješaka i ljudskih života, jer je predmetna dionica puta pogodna za postizanje većih brzina, dok uslovi za kretanje pješaka nisu na visokom nivou.

Aldin Šljivo: je pokrenuo vijećničku inicijativu za renoviranje sportske dvorane – sportske sale „B“ i „C“, te nabavku fudbalskih lopti za rekreacije. Razlog za inicijativu je što se sale „B“ i „C“ nalaze u izuzetno lošem stanju, pri čemu su zidovi ishabani, svlačionice neuslovne, stalno je prisutan neugodan miris, krov na salama prokišnjava, što utiče na uništavanje parketa. Uz to lopte sa kojima se igra rekreacija su u trošnom stanju i nikako nisu za upotrebu.